

# Kes jenayah terus menurun

KUALA TERENGGANU 17 Jan. - Kadar kes jenayah di seluruh negara menurun sebanyak 6.5 peratus kepada 23,323 kes pada tahun lalu berbanding pada tahun sebelumnya.

Pengarah Jabatan Pencegahan dan Pembanterasan Jenayah (JPPJ), Datuk Ayub Yaakub berkata, ini membuktikan komitmen yang tinggi seluruh warga polis di samping kerjasama orang awam yang terus meningkat.

Menurut beliau, Terengganu pun merupakan antara negeri yang mencatatkan penurunan tertinggi iaitu 36.1 peratus dengan hanya 338 kes dilaporkan tahun lalu berbanding sebanyak 520 kes pada tahun sebelumnya.

Beliau berkata demikian kepada pemberita selepas Majlis Penyampaian Watikah Pelantikan Komandan Kor Sukarelawan Siswa-Siswi Polis (Suksis) Universiti Sultan Zainal Abidin (UniSZA) di Resort Qui-nara Al Safir, Tok Jembal di sini, hari ini.

Yang turut hadir Naib Canselor UniSZA, Prof Dr. Yahya Ibarahim dan Ketua Polis Negeri, Jamshah Mustapa..

Ayob berkata, melalui bidang keberhasilan utama negara (NKRA) yang bermula tahun lalu sehingga 2015, polis memberi tumpuan kepada jenayah pecah rumah di seluruh negara setelah fasa pertama terarah kepada jenayah jalanan.

Katanya, bagi meningkatkan keberkesanannya bertindak dalam menangani jenayah, pihak polis berusaha memperluaskan Unit Ronda Bermotorsikal (URB) dengan 1,800 unit motosikal akan diagihkan di seluruh negara.

"Sebelum ini beberapa negeri telah menerima motosikal berkuasa 250cc itu seperti Pahang, Johor, Selangor, Kuala Lumpur dan Pulau Pinang manakala Terengganu akan menerima sebanyak 51 buah dalam waktu terdekat ini."

TARIKH: 18/1/2013

AKHBAR UTUSAN MALAYSIA